

武昌醫館叢書

二四



傷寒論卷第八

漢 張仲景述 晉 王叔和撰次

辨發汗後病脉證并治第十七

辨不可吐第十八 辨可吐第十九

辨發汗後病脉證并治第十七

合二十五法方二十四首

太陽病發汗遂漏不止惡風小便難四肢急難

以屈伸者屬桂枝加附子湯第一

六味前有三病證

太陽病服桂枝湯煩不解先刺風池風府却與

桂枝湯第二

五味

服桂枝湯汗出脉洪大者與桂枝湯若形似瘧



一日再發者屬桂枝二麻黃一湯第三

七味

服桂枝湯汗出後煩渴不解脉洪大者屬白虎

加人參湯第四

五味

傷寒脉浮自汗出小便數心煩惡寒脚攣急與

桂枝攻表得之便厥咽乾煩躁吐逆作甘草乾

薑湯厥愈更作芍藥甘草湯其脚即伸若胃氣

不和與調胃承氣湯若重發汗加燒針者與四

逆湯第五

甘草乾薑湯芍藥甘草湯並二味調胃承氣湯四逆湯並三味

太陽病脉浮緊無汗發熱身疼八九日不解服

湯已發煩必衄宜麻黃湯第六

四味

傷寒發汗已解半日復煩脉浮數者屬桂枝湯

證第七

用前第二方

發汗後身疼脉沈遲者屬桂枝加芍藥生薑各一兩人參三兩新加湯第八

六味

發汗後不可行桂枝湯汗出而喘無大熱者可與麻黃杏子甘草石膏湯第九

四味

發汗過多其人叉手自冒心心下悸欲得按者屬桂枝甘草湯第十

二味

發汗後齊下悸欲作奔豚屬茯苓桂枝甘草大

棗湯第十一

四味甘爛水法附

發汗後腹脹滿者屬厚朴生薑半夏甘草人參

湯第十二 五味

發汗病不解反惡寒者虛也屬芍藥甘草附子

湯第十三 三味

發汗後不惡寒但熱者實也當和胃氣屬調胃

承氣湯證十四 用前第五方

太陽病發汗後大汗出胃中乾煩躁不得眠若

脉浮小便不利渴者屬五苓散第十五 五味

發汗已脉浮數煩渴者屬五苓散證第十六 用前

第十五方



傷寒汗出而渴者宜五苓散不渴者屬茯苓甘

草湯第十七

四味

太陽病發汗不解發熱心悸頭眩身瞤動欲擗

一作

地者屬真武湯第十八

五味

傷寒汗出解之後胃中不和心下痞乾噫腹中

雷鳴下利者屬生薑瀉心湯第十九

八味

傷寒汗出不解心中痞嘔吐下利者屬大茈胡

湯第二十

八味

陽明病自汗若發其汗小便自利雖鞭不可攻
須自欲大便宜蜜煎若土瓜根豬膽汁為導第



二十一

蜜煎一味
豬膽方二味

太陽病三日發汗不解蒸蒸發熱者屬調胃承

氣湯證第二十二

用前第五方

大汗出熱不去內拘急四肢疼又下利厥逆惡

寒者屬四逆湯證第二十三

用前第五方

發汗後不解腹滿痛者急下之宜大承氣湯第

二十四

四味

發汗多亡陽譫語者不可下與茈胡桂枝湯和

其榮衛後自愈第二十五

九味

二陽併病太陽初得病時發其汗汗先出不徹因

轉屬陽明續自微汗出不惡寒若太陽病證不罷者不可下下之爲逆如此可小發汗設面色緣緣正赤者陽氣怫鬱在表當解之熏之若發汗不徹不足言陽氣怫鬱不得越當汗不汗其人煩躁不知痛處乍在腹中乍在四肢按之不可得其人短氣但坐以汗出不徹故也更發汗則愈何以知汗出不徹以脉濇故知也

未持脉時病人叉手自冒心師因教試令欬而不即欬者此必兩耳聾無聞也所以然者以重發汗虛故如此



發汗後飲水多必喘以水灌之亦喘

發汗後水藥不得入口爲逆若更發汗必吐下不止

陽明病本自汗出醫更重發汗病已差尚微煩不了了者必大便鞭故也以亡津液胃中乾燥故令大便鞭當問小便日幾行若本小便日三四行今日再行故知大便不久出今爲小便數少以津液當還入胃中故知不久必大便也

發汗多若重發汗者亡其陽譫語脉短者死脉自和者不死



傷寒發汗已身目爲黃所以然者以寒濕一作溫在

裏不解故也以爲不可下也於寒濕中求之

病人有寒復發汗胃中冷必吐衄

太陽病發汗遂漏不止其人惡風小便難四肢微

急難以屈伸者屬桂枝加附子湯方一

桂枝三兩 去皮

芍藥三兩

甘草二兩 炙

生薑三兩 切

大棗十二枚 擘

附子一枚 炮

右六味以水七升煮取三升去滓溫服一升本

云桂枝湯今加附子

太陽病初服桂枝湯反煩不解者先刺風池風府



却與桂枝湯則愈方二

桂枝三兩 去皮

芍藥三兩

生薑三兩 切

甘草二兩 炙

大棗十二枚 擘

右五味以水七升煮取三升去滓溫服一升須臾啜熱稀粥一升以助藥力

服桂枝湯大汗出脉洪大者與桂枝湯如前法若形似瘧一日再發者汗出必解屬桂枝二麻黃一

湯方三

桂枝一兩 十銖

芍藥一兩 六銖

麻黃一十六銖 去節

生薑一兩 六銖

杏仁十六箇 去皮尖

甘草一兩 二銖 炙



大棗

五枚

右七味以水五升先煮麻黃一二沸去上沫內諸藥煮取二升去滓溫服一升日再服本云桂枝湯二分麻黃湯一分合爲二升分再服今合爲一方

服桂枝湯大汗出後大煩渴不解脉洪大者屬白虎加人參湯方四

知母

六兩

石膏

一斤碎

甘草

二兩炙

粳米

六合

人參

二兩

右五味以水一斗煮米熟湯成去滓溫服一升



日三服

傷寒脉浮自汗出小便數心煩微惡寒脚攣急反
與桂枝欲攻其表此誤也得之便厥咽中乾煩躁
吐逆者作甘草乾薑湯與之以復其陽若厥愈足
溫者更作芍藥甘草湯與之其脚即伸若胃氣不
和譌語者少與調胃承氣湯若重發汗復加燒針
者與四逆湯五

甘草乾薑湯方

甘草

炙四兩

乾薑

二兩

右二味以水三升煮取一升五合去滓分溫再

服

芍藥甘草湯方

白芍藥

四兩

甘草

四兩

右二味以水三升煮取一升五合去滓分溫再服

調胃承氣湯方

大黃

四兩去酒洗皮

甘草

二兩

芒消

半升

右三味以水三升煮取一升去滓內芒消更上微火煮令沸少少溫服之

四逆湯方

甘草

二兩 炙

乾薑

一兩 半

附子

一枚生用去皮破八片

右三味以水三升煮取一升二合去滓分溫再服強人可大附子一枚乾薑三兩

太陽病脉浮緊無汗發熱身疼痛八九日不解表證仍在此當復發汗服湯已微除其人發煩目瞑劇者必衄衄乃解所以然者陽氣重故也宜麻黃湯方六

麻黃

三兩 去節

桂枝

二兩 去皮

甘草

一兩 炙

杏仁

七十箇 去皮尖

右四味以水九升先煮麻黃減二升去上沫內

諸藥煮取二升半去滓溫服八合覆取微似汗
不須啜粥

傷寒發汗已解半日許復煩脉浮數者可更發汗

屬桂枝湯證七

用前第二方

發汗後身疼痛脉沈遲者屬桂枝加芍藥生薑各
一兩人參三兩新加湯方八

桂枝

三兩
去皮

芍藥

四兩

生薑

四兩

甘草

二兩
炙

人參

三兩

大棗

十二
枚擘

右六味以水一斗二升煮取三升去滓溫服一
升本云桂枝湯今加芍藥生薑人參

發汗後不可更行桂枝湯汗出而喘無大熱者可與麻黃杏子甘草石膏湯方九

麻黃

四兩
去節

杏仁

五十箇
去皮尖

甘草

二兩
炙

石膏

半斤
碎

右四味以水七升先煮麻黃減二升去上沫內諸藥煮取二升去滓溫服一升本云黃耳杯發汗過多其人叉手自冒心心下悸欲得按者屬桂枝甘草湯方十

桂枝

二兩
去皮

甘草

二兩
炙

右二味以水三升煮取一升去滓頓服